

Okzitaniako Calandretak manifestaldia deitu du murgiltze ereduaren alde

LEGE BABESIK GABE, denak dabil-tza berdin, esan nahi baita Seaska, Calandreta, Diwan eta Bresola. Bertako hizkuntzan irakasteagatik oztopoak baino ez dizkiete jartzen. Okzitaniako Artixeko Calandreta ixteko mehatxupean dago, adibi-



Artixeko ikastetxeko haurrak herriko etxe aurrean eskolak ematen protesta gisa.

dez. Protesta bide anitz erabili dute orain arte eta martxoaren 15ean manifestaldia egingo dute Paueko kaleetan, Artixeko eskola ez deza-

ten itxi eskatzeko eta murgiltze erduko ikastetxeentzako legea eskatzeko. Seaskak autobusak antolatuko ditu Pauera joateko.

Athleticen inguruko ipuinak sakelakoan

LEHOLAK AMETSETAN: *Bixentaren abentura zurigorriak* izeneko ipuin bilduma aurkeztu dute Athletic Club Fundazioak eta Euskaltzaleen Topaguneak. Mr. Pentland, Iribar, Zarra eta emakumezko taldeko jokalariek dira zazpi ipuinetako

protagonistak. Ipuinak sakelakoe-tarako eta tabletetarako prestatu dituzte, Kirmen Uriberen hitzekin eta Asisko Urmenetaren marrazkiekin. Helburua gurasoen eta haurren artean euskararekiko motibazioa handitzea da.

Bahea

Xabier Lasak *Berrian* esanak:

“ETB2n eta REn [Radio Euskadin] lan egiteko, aurrerantzean, besteak beste, euskara maila dezentea eskatuko omen da, zeregin komunikatzaileen jarduteko batik bat. Neurria polemikoa, ahots eta aurpegi distiratsu batzuzentzat baztertzaila, kalitatearen kalterakoa eta beste izango dela iragarri dute EITB orain bezain erdalduna edo erdaldunagoa nahi dutenek. Ez du zertan. REn azken urteetan sartzen ari diren esatari gazteak, elebidunak gehienak, aisa hartu dute beteranoen eskarmentua, eta prestatuta dirudite bi hizkuntzetan lan egiteko, biren errealitateetan berdintasunean eta natural murgiltzeko. Ez dute jakingo Hollywoodek 1957an zeini eman zion Oscarra, esaterako, baina irakurria edukiko dute Harkaitz Cano edo Koldo Izagirreraren libururen bat, eta kapaz dira bertso saio bat itzultzailerik gabe jarraitzeko”.

EKONOMIAREN TALAIAN • TERMOMETROA

Troika eta biolentziak

BERRIKITAN BILBON IZAN DA TROIKA (ELGA, NDF, EB), bankuen eta enpresa multinazionalen ordezkari-kin, hala nola Madril eta Gasteizko gobernuen exekutiba gorenekin. Horrek milaka laguneko protesta sindikal eta soziala eragin du. Eragileok probokaziotzat hartu dute langabezia, pobrezia, prekarietatea eta gizar-te-desberdintasuna eragin duen finantza eta ekonomia krisiaren arduradunak martxoaren 3an etorri izana euskal lurretara. Manifestarien talde txiki batek biolentzia erabiltzeko hautua egin du, enpresa handietako egoitzen kontra eta hotel, lokal eta hiriko altzari zenbaiten kontra. Protesten deitzaileek ekintza horiekin loturarik ez dutela adierazi dute. Erakunde eta alderdi politikoez ez dute segundo bakarra ere itxaron gertaerak gaitzetsi eta gainerako guztiei euren gaitzespina eskatzeko.

Berriz ere biolentzia ezberdinen inguruko eztabaida azalera da. Kurioso da, biolentzia herri mugimendutik baino ez datorrenean hasten dira alderdi eta instituzioak

garrasika. Eurentzat, dirudienez, Troiak inposaturiko neurri ekonomikoak ez dira biolentzia, milioika lagun langabeziara, pobrezia eta bazterkeriara jaurtitzen dituzten arren. Areago, gaitzetsi beharrean, bere ordezkariak gonbidatu, babestu, abegitsu hartu eta txalotu dituzte Bilbon. Horixe da kapitalismoaren biolentzia estrukturala. Horixe da ohiko gobernuak babesten duten biolentzia. Hori da biolentzia probokatzaila. Ez dituzte erakuslehoak hausten, ezta kaleko altzariak ere, baina soldata eta dieta milioidunak dituzten horiek jendea langabeziak eta gosez hiltzen dute. Eurak dira biolentzoak, lepazuridunak izan arren. Eta jakina, desesperantza eta haserrea sorrarazten dute. Horregatik, kaputxarrik ez badaramate ere, manifestarien talde txiki batek lokal komertzialak eta kaleko altzariak erasotzearen ardura euren da.

Juan Mari Arregi

